

ԷՍՊԵՍ ՉԻ ՄՆԱ

(Հին գրույց)

- Լինում է թե չէ, ո՞վ գիտի հաստատ,
Եվ ի՞նչն է հաստատ աշխարհքի վերա...—
Աշխարհքում հաստատ մի բան կա մենակ,
Այն է, որ հաստատ ոչ մի բան չկա:—
- 5 Լինում է՝ իբրև գյուղացի մի մարդ,
Աղքատ, օրական ապրուստի կարոտ:
Ունենում է սա մի խելոք տղա,
Տանում է ծառա տալի մեկի մոտ:
- Տարիք են անցնում: Էս խելոք տղան
10 Էնպես է ազնիվ ու ժիր ծառայում,
Որ տերն էլ սըրա վարձը շատացնում,
Ինչպես իրենը՝ էնպես է նայում:
Հիշում է մի օր հայրը իր որդուն
Ու վեր է կենում գալի տեսություն.
- 15 — Հը՛, ո՞նց ես, որդիս, հիմի էլ էնպես
էլ մերկ ու տրկլոր, էլ քաղցած հո չե՛ս:
— Չէ՛, լավ եմ, հայրիկ, ապրուստս միշտ կա,
Բայց ի՞նչ անես որ... էսպես չի մընա...
- Գընում է հայրը: Տարիք են անցնում:
20 Առաջ է գընում տղան օրն օրին,
Վերջը բարձրանում, պալատն է հասնում,
Դառնում է ծառա մեծ թագավորին:
Հիշում է մի օր հայրը իր որդուն
Ու վեր է կենում գալի տեսություն.
- 25 — Հը՛, ո՞նց ես, որդիս, էլ ի՞նչ ես ուզում,
Լողում ես առատ էս լիքը ծովում:
— Հա՛, լի եմ, հայրիկ, դու հանգիստ գընա,

Բայց ի՞նչ անես որ... էսպես չի մընա...

- Գընում է հայրը: Տարիք են անցնում:
30 էնքան է սիրվում մեր խելոք ծառան,
Որ թագավորը բերում է սըրան
Իրեն տերության երկրորդն է անում:
Հիշում է մի օր հայրը իր որդուն
Ու վեր է կենում գալի տեսություն.
35 – Հը՛, ո՞նց ես, որդիս, էլ ի՞նչ է մընում,
Քու խոսքովն են ողջ նըստում – վեր կենում:
– Հա՛, մեծ եմ, հայրիկ, նազիր եմ ահա,
Բայց ի՞նչ անես որ... էսպես չի մընա...

- Գընում է հայրը: Տարիք են անցնում:
40 էս բարի երկրի թագավորը ծեր
Մի օր անժառանգ ընկնում է մեռնում,
Գահն ու աշխարհքը մընում են անտեր:
Ժողովք են կանչում երկրի մեծերին:
Ժողովք են գալի, խորհուրդ են անում,
45 Բերում են իրենց խելոք նազիրին
Առքով ու փառքով թագավոր դընում,
Ու մեր գյուղացին լըսում է մի օր՝
Դարձել է իրեն որդին թագավոր:
Գալիս է. – Որդի՛ս, էլ ի՞նչդ է պակաս,
50 Ամբողջ աշխարհքում մի դու ես, որ կաս...
– Փառք Աստծու, հայրիկ, ունեմ թագ ու գահ,
Բայց ի՞նչ անես որ... էսպես չի մընա...

- Գընում է հայրը: Տարիք են անցնում:
Իր գահին բազմած ինքնակալը նոր
55 Մահվան ու կյանքի վճիռ է անում՝
Բուռը հավաքած աշխարհքը բոլոր:

Բուռըդ հավաքի աշխարհքը թեկուզ,
Թողնելու ես ողջ դարձյալ աշխարհքին:
Մեր թագավորն էլ մի անգամ էսպես
60 Մահիճ է ընկնում, ավանդում հոգին:

Լըսում է ծերուկ հայրը մի օր էլ,
Որ իր թագավոր որդին չըմնաց:
Բնչ ասել կուզի – գալիս է վըրեն,
էլ ի՛նչ մըղկըտոց, էլ ի՛նչ սուգ ու լաց...
65 Զորքով, աշխարհքով, ծեսով, հանդեսով
Արքային վայել թաղում են անում,
Ու վեր են կենում՝ զըրույց անելով
Ամենքը իրենց տըներն են գնում:
Տարիք են անցնում: Հայրը մի անգամ
70 Գալիս է որդու շիրիմի վրա:
Գալիս է, տեսնում՝ մարմար մահարձան,
Բայց վըրեն գրած... «էսպես չի մընա...»:

Գրնում է հայրը: Տարիք են անցել.
Ո՞վ կարա մեզնից հաշիվն իմանա...
75 էն օրից էսօր անվերջ, դարեդար
Զրույցն ասում է – «էսպես չի մընա...»
Ու չըկա շըքեղ արձանն արքայի,
Ոչ նրա քաղաքն աշխարհքի վըրա,
Մերն է աշխարհքը ու կյանքը հիմի,
80 Բայց մեր աշխարհքն էլ... էսպես չի մընա..